

Maqsadi

Mazkur Buxgalteriya hisobining milliy standarti (BHMS) «Buxgalteriya hisobi to'g'risida»gi O'zbekiston Respublikasining [Qonuniga](#) asosan ishlab chiqilgan va O'zbekiston Respublikasida buxgalteriya hisobini normativ tartibga solish elementi bo'lib hisoblanadi.

Moliyaviy hisobotni tayyorlash va taqdim etish uchun konseptual asos doirasida daromadlar hisobot davrida xususiy kapital egalari tomonidan qo'yilma bilan bog'liq ko'payishdan tashqari xususiy kapitalni ko'payishiga olib keladigan aktivlarning ko'payishi yoki majburiyatlarning kamayishi ko'rinishidagi hisobot davrida iqtisodiy nafning ko'payishi sifatida aniqlanadi.

Xo'jalik faoliyatidan daromad asosiy, operasion va moliyaviy faoliyatdan daromadlarni o'z ichiga oladi.

Mazkur standartda daromad deganda xo'jalik yurituvchi sub'yektning odatiy faoliyati davomida olingan daromadlar, shu jumladan mahsulot realizasiyasidan (ishlarni bajarish va xizmat ko'rsatish) daromadlar, olingan foizlar, dividendlar, royaltlar va boshqalar tushuniladi.

Mazkur standartning maqsadi xo'jalik yurituvchi sub'yektning asosiy xo'jalik faoliyatidan daromadlarini va ularni hisobga olish tartibini belgilash hisoblanadi.

Asosiy xo'jalik faoliyatidan daromadlarni hisobga olishda asosiy masala bo'lib daromadni tan olish vaqtini aniqlash hisoblanadi. Asosiy xo'jalik faoliyatidan daromad xo'jalik yurituvchi sub'yektga kelgusida iqtisodiy naf tushishi ehtimoli bo'lgan paytda, shuningdek bu nafni ishonchli va aniq o'lchash mumkin bo'lganda aks ettiriladi. Bu standart mazkur mezonlar bo'yicha

talablar bajariladigan va binobarin, asosiy xo‘jalik faoliyatidan tushadigan daromad e’tirof etiladigan vaziyatni belgilab beradi. Shuningdek u mazkur mezonlarni qo‘llanish yuzasidan amaliy ko‘rsatmalar beradi.